

四庫全書

子部

# 欽定四庫全書

子部

名賢氏族言行類稿卷三十六

七

詳校官典籍臣潘奕雋

主事臣祁韻士覆勘

總校官進士臣朱鈴

校對官主事臣馮培

謄錄監生臣顧聲

欽定四庫全書

名賢氏族言行類稿卷三十六

宋 章定 撰

許

六百三十七

姓纂姜姓炎帝之後周武王封其裔孫文叔於許後  
為楚所滅子孫分散以國為氏晉有許偃楚有許伯  
鄭有許瑕

後漢許劭字子將汝南平輿人少峻名節好人倫多所

賞識與兄靖俱有高名好覈論人物每月輒更其品  
題故汝南俗有月旦評 兄虔亦知名汝南人稱平  
輿淵有二龍

循吏許荆字少張為桂陽太守為設喪祭婚姻制度使  
知禮禁在事十二年父老稱歌及卒人為立廟樹碑  
許慎字叔重博學經籍時人語曰五經無雙許叔重

方術許楊字偉君少好術數後汝南太守鄧晨署為都  
水掾起塘四百餘里百姓得其便累歲大稔 後起

廟圖形像百姓思其功皆祭祀之

方術許曼善卜占之術多有顯驗

魏志許褚字仲康容貌雄毅勇力絕人一手逆曳牛尾  
行百餘步淮汝陳梁間聞之皆畏憚軍中以褚力如  
虎而癡故號曰虎癡遷武衛將軍

蜀志許靖字文休少知名有人倫臧否之稱 英才偉  
士智畧足以計事 倜儻瑰偉有當世之具

許慈字仁篤為博士博涉多聞信一時之學士

晉書許邁字叔玄句容人恬靜不慕仕進放絕世務以  
尋仙館

孝義許孜字季義親沒負土建墓號其居為孝順里旌  
表門閭

南史許懋字昭哲為國子博士號為經史笥 子亨字  
亨道真正有古人風卒衛尉卿

孝義許昭先父母老病竭力致養甘旨必從宗黨嘉其  
孝行

北史許謙字元遜少有文才善天文圖讖學道武以為  
右司馬叅贊初基 子洛陽為鴈門太守

許彥字道謨少受易太武徵令卜筮頻驗遂在左右叅  
與謀議質厚慎密與人言不及內事賜爵武昌公

許惇字秀良清識敏速達於政事位司徒主簿以明斷  
見知時人號為入鐵主簿遷陽平太守勲貴屬請朝  
夕徵求惇御之以道咸以無怨政為天下第一特加  
賞異圖形於闕詔頒天下遷殿中尚書惇美鬚下垂

至帶省中號長鬣公

許善心字務本多聞默識為當時所稱謂為神童仕隋

除祕書丞嘗製神雀頌文不加點筆不停毫

藝術許遵易善筮兼曉天文風角

唐許紹字嗣宗安州人與高祖同學大業末任夷陵通

守盜起州境獨完流人自占數十萬開倉賑給蕭

銑遣兵圍陝州紹擊走之

許圜師有器幹研涉藝文擢進士第後遷相州專以



寬治州人刻石頌美部有受賕者不忍按但賜清白  
箴其人自愧

許孟容字公範京兆人擢進士異等舉明經累遷給事中  
自袁高爭盧杞後凡十八年門下無議可否者至  
孟容數論駁四方知天子開納多士浩然想見其風  
元和初遷京兆尹神策軍李昱貸富人錢八百萬  
不肯還孟容遣吏捕使償曰不如期且死一軍皆驚  
訴於朝奏曰臣職司輦轂當為陛下抑豪強錢未盡

輸昱不可得帝嘉其守正豪右大震盜殺武元衡孟容白宰相曰漢有一汲黯奸臣寢謀今狂賊敢爾願起裴中丞後數日果相度孟容方勁有禮學每所折衷咸得其正好提掖士天下清議歸之

許遠寬厚長者明吏治

許伯會越州人舉孝廉

許法慎滄州人三歲時母病不飲乳慘慘有憂色後

親喪常廬於塋有甘露嘉禾之祥天寶中表異其閭

許叔牙字延基句容人獻詩纂義十篇大字寫付司經  
子儒字文舉高宗時為博士

許景先常州人舉手筆俊拔茂才異等連中授侍御史  
評按不避近疆知制誥以雅厚稱張說曰許舍人  
之文雖乏峻峯激流然詞旨豐美得中和之氣帝  
自擇刺史景先由吏部侍郎為刺史治虢州詔諸臣  
以上祖道洛濱賜詩遣之

許允宗善醫

宋朝許元字子春泰州海陵人也少以蔭為太廟齋郎  
稍遷太子中舍知如皋縣元為吏其術長於治財自  
元昊叛西兵出久無功而天下勞弊三司言元有才  
以主權貨元言先時賈人入粟塞下京師錢不足以  
償故錢償愈不足則粟入愈少而價愈高是謂內外  
俱困請高塞粟之價下南鹽以償之使東南去積滯  
而西北之粟盈此輕重之術也行之果便於是范仲  
淹薦其能擢江淮荆浙制置發運判官既又為使元

曰以六路七十二州之粟不能足京師者吾不信也  
至此治千艘浮江而上所過州縣留三月食其餘悉  
發而州縣之廩遠近以次相補由是不數月京師足  
食既而歎曰此可為於乏時然歲漕不給者有司之  
職廢也乃考故事明約信令發斂轉徙至於風波遠  
近遲速賞罰皆有法凡江湖數千里外談筴治之不  
擾不勞而用以足先是江淮歲漕京師者常六百萬  
石其後十餘歲歲益不充至元為之歲必六百萬而

常餘百萬以備非常仁宗嘗謂執政曰發運使總六  
路之廣財貨調用幣帛穀粟歲千百萬宜得其人而  
久任之擢元天章閣待制在職十三年卒

許將字冲元福州閩縣人也舉進士第一紹聖元年召  
為吏部尚書遷左丞時章惇為相與蔡卞同肆羅織  
貶謫元祐臣僚惇卞乞發司馬光墓將獨無言哲宗  
問曰卿不言何也將曰發人之墓非盛德事哲宗曰  
朕意與卿同乃不從嘗議正夏人罪以涇原近寇而

地廣謀帥尤難乞用章凖凖果有功徽宗即位為門  
下侍郎 凖撫定鄆鄆州欲舉師過河朝議難之將  
獨以蕃夷不可爽信而兵機有不可失既已戒期願  
遂從之未幾捷書至卒謚文定

呂 六百三

姓纂炎帝姜姓之後虞夏之際封呂今南陽宛縣西  
亭是也至周失國子孫氏焉

史記呂尚東海上人其先祖嘗為四嶽有功封於呂尚

其苗裔也本姓姜氏從其封姓故曰呂尚號曰太公  
望多兵權與奇計故後世之言兵及周之陰權皆宗  
太公為本謀 六韜曰文王將田史編布卜曰田於  
渭陽非龍非鸞非虎非羆兆得公侯天遺汝師以之  
佐昌施及三王文王曰兆致是乎文王乃齋三日田  
於渭陽卒見太公坐茅以漁乃載與俱歸立為師詩  
曰維師尚父時維鷹揚

呂不韋陽翟大賈人也莊襄王以為丞相封文信侯



魏志呂布字奉先

呂虔字子恪領泰山太守擒奸討暴百姓獲安躬蹈矢石所征輒克在郡十數年甚有威惠

蜀志呂乂字季陽入為尚書令衆事無留門無停賓歷職內外為政簡而不煩號為清能

呂凱字季平為永昌郡功曹威恩內著為郡中所信

吳志呂蒙字子明孫權謂蒙宜學問以自開益後魯肅過蒙言議拊蒙背曰吾謂大弟但有武畧耳今者學

識英博非復吳下阿蒙蒙曰士別三日即更刮目相待果敢有膽籌畧奇至勇而有謀斷識軍計譎郝普襲關侯最其妙者

呂範字子衡有容觀姿貌邑人劉氏家富女美範求之女母嫌欲勿與劉氏曰觀呂子衡寧當久貧者也遂與之婚忠篤亮直以憂公為先累遷至前將軍假節拜揚州牧子據字世議

呂岱字定公體素精勤躬親王事上馬輒自超乘不由

跨躡國家永無南顧之虞

南史呂安國在宋以將領見任穩重有幹局累遷光祿大夫

呂僧珍字元瑜仕梁遷散騎常侍入直秘書省直中省夜還秘書武帝欲榮以本州拜兗州刺史平心率下不私親戚

北史呂洛拔代人以壯勇知名

呂羅漢祖顯字子明歸魏拜鉅鹿太守百姓頌之曰時

惟府君克清克明緝我荒土人胥樂生願壽無疆以享長齡父溫有文武才畧位上黨太守有能名羅漢弱冠以武幹知名

呂思禮性溫潤不雜交遊長於論難諸生語曰講書論易鋒難敵舉秀才對策高第

唐呂才博州人太宗詔舉善音者溫彥博魏徵盛稱之即召參論樂事帝病陰陽家所傳書多謬偽淺惡才刪落煩訛掇可用者為五十三篇合舊書四十七

凡百篇詔頒天下才之言不甚文要欲救俗失切時  
事俾易曉也故剏其三篇大畧云卜筮者高談祿命  
以悅人心矯言禍福以規人財長平坑降卒豈俱犯  
三刑南陽多近親非俱當六合擢太常丞卒

呂諲河中人少力於學志行整飭第進士趨靈武肅宗  
才之拜御史中丞 乾元初九節度兵敗帝憂之擢諲  
同平章事知門下省 始建請荊州置南都號江陵  
府以諲為尹為治不急細務決大事剛果不撓威惠

兩行為荊州號令明賦斂均其治尚威信故軍士効命合境無盜賊民歌詠之自至德以來處方面者數十人諲最有名

呂渭字君載河中人第進士遷禮部侍郎

呂溫字和叔渭之子從陸贄治春秋梁肅為文章擢進士第藻翰清富一時流輩推尚

呂元膺字景夫鄆州人姿儀瓌秀有器識游京師謁故相齊映映歎曰吾不及識婁郝殆斯人類乎策賢良

高第德宗時為蘄州刺史嘗錄囚囚或白父母在明日歲旦不得省為恨因泣元膺惻然釋之而戒還期吏白不可答曰吾以信待人人豈違如期而至羣盜感愧自是悉避去元和中擢給事中為同州刺史帝謂宰相曰元膺直氣謹言宜留左右李藩等謝因言陛下及此乃宗社無疆之休進御史中丞拜岳鄂觀察使改河中節度使時方鎮多姑息獨元膺秉正自將監軍及中人往來者無不嚴憚入拜吏部侍郎正

色立朝處事裁宜人服其有體居官始終無訾缺

呂向字子回工草隸能一筆環寫百字若縈髮然世號連錦書彊志於學通古今開元十年召入翰林院時帝歲遣使採擇天下姝好內之後宮號花鳥使向因奏美人賦以諷帝善之擢左拾遺從帝東巡帝引蕃夷酋長入仗內賜弓矢射禽向上言鷓鴣不鳴未為瑞鳥豺虎雖伏未為仁獸嘗以李善釋文選為繁醲與呂延濟劉良張銑李周翰更為詁解號五臣註



五代呂琦字輝山幽州安次人也父充為守光所殺并族其家琦年十五見執充故客趙玉給其監者曰此吾弟也監者信之縱琦去玉與琦得俱走琦足弱不能行玉負之而行逾數百里變姓名乞食於道以免琦為人美丰儀重節槩少喪其家遊學汾晉之間唐莊宗鎮太原以為代州軍事推官明宗時為駕部員外郎兼侍御史知雜事長興中廢帝罷居清化坊與琦同巷琦數往過之後廢帝入立待琦甚厚事晉為

兵部侍郎卒 子餘慶端

宋朝呂餘慶開寶六年除尚書左丞卒

呂端字易直淳化四年拜叅知政事同平章事端持重

識大體同列奏對或多異議一日內出手札戒諭自

今中書事經呂端裁決乃得聞奏 太宗崩真宗立

垂簾引見羣臣端平立殿下不拜請捲簾升殿審視

然後降階率羣臣拜呼萬歲 以疾求罷除太子太

保卒諡正惠 孫誨字獻可嘗為中丞諫疏見事畧

呂蒙正字聖功河南人也祖夢奇戶部侍郎父龜圖起居郎蒙正舉進士第一為將作監丞通判昇州初龜圖黜其妻劉氏并棄蒙正劉氏誓不改適及蒙正莅官迎二親同堂異室奉養並至時稱其孝龜圖卒有詔起復未幾遷翰林院學士拜左諫議大夫叅知政事蒙正入朝堂有朝士指之曰此子亦叅政耶蒙正佯為不聞而過之其同列不平令詰其姓名蒙正遽止之罷朝同列猶不能堪悔不窮問蒙正曰若一知

其姓名則終身不能忘固不如勿知也時皆服其量  
為平章事趙普開國元老蒙正晚出歷官一紀與普  
同在相位普甚推許之先是盧多遜為相其子雍起  
家即授水部員外郎後遂以為常及是蒙正奏曰臣  
忝甲科及第釋褐止授九品京秩况天下才能老於  
巖穴不能沾寸祿者多矣今臣男始離襁褓膺此寵  
命恐懼譴責乞以臣釋褐時所授官補之自是止授  
九品京秩因以為定制有朝士家藏古鏡自言能照

二百里欲因蒙正之弟來獻以求知其弟因間從容  
言之蒙正笑曰吾之面不過尺許安用照二百里其  
弟遂不敢復言聞者歎服 國朝以來三居相位唯  
趙普與蒙正拜司空兼門下侍郎咸平六年授太子  
太師封萊國公改封徐又封許洛中有園亭時會親  
友環侍皆子孫間舉壽觴釋然自得 真宗謁陵寢  
祠后土過洛兩幸其第當世榮之真宗問蒙正曰卿  
諸子孰可用蒙正對曰諸子皆不足用有姪夷簡宰

相才也蒙正客富言一日白蒙正曰言有子甚幼欲  
令入書院就讀蒙正許之蒙正見其子驚曰此兒他  
日名位與吾相似而勲業遠過吾言之子即弼也蒙  
正知人如此卒諡文穆 龜圖弟龜祥龜祥子蒙亨  
蒙亨子即夷簡也蒙正子居簡當慶厯中為提點京  
東刑獄時夏竦有憾於石介介已死竦言於仁宗曰  
介不死且北走矣乃遣中使發介棺以驗居簡謂中  
使曰萬一介果死則朝廷為無故發人之墓中使曰

於君何如居簡曰介之死當時必有內外親族及門  
生會塋令檄問之可也中使從其言令結狀保証中  
使入奏仁宗察其誣乃得不發時人以居簡為長者  
居簡官至龍圖閣直學士

呂夷簡字坦夫河南人祖龜祥嘗知壽州遂以家焉擢  
進士又舉制科嘗通判通濠二州往河北按行水災  
還奏曰今田器有算非以重本也請除之真宗納其  
言自是天下農器皆免算時王曾為知制誥一日至

中書見宰相王旦旦謂曾曰君識呂夷簡否曾曰不識也他日復問曾曰嘗訪之士大夫人多稱其才者旦曰此人器識遠大君其善交之異日當與君對秉鈞軸曾曰公何以知之旦曰吾不識夷簡但以其奏請得之曾曰奏請何事旦曰如不稅農器是已仁宗嘗問輔臣四方奏獄來上不知所以裁之如之何則可夷簡曰凡奏獄必出於疑疑則從輕可也仁宗深以為然終仁宗之世疑獄一從於輕章懿皇后



上仙夷簡因奏事簾前曰聞夜中有宮嬪亡者章獻  
即起挽仁宗入內有頃獨坐謂夷簡曰一宮人死相  
公何與夷簡曰臣待罪宰相內外事無不當與章獻  
怒曰相公欲離間吾子母耶夷簡曰太后他日不欲  
保全劉氏乎太后不以劉氏為念則臣不敢言若尚  
念劉氏也喪禮宜從厚章獻悟始從其言 自西鄙  
用兵劉平死於陣黃德和誣平降賊詔腰斬德和議  
者以朝廷使宦者監兵主帥節制不得專故平失利

乞罷監兵仁宗以問夷簡夷簡曰不必罷但擇謹厚者為之仁宗委夷簡擇其人夷簡曰臣待罪宰相不與中官私交無由知其賢否願詔押班保舉有不職與同罪仁宗許之翌日都知押班叩首乞罷監兵於是士大夫嘉夷簡之有謀以疾謝位拜司空平章軍國重事仁宗憂之乃剪髭賜之以療疾薨諡文靖

子公綽公弼公著公孺公綽除翰林院侍讀學士公弼神宗即位遷刑部侍郎樞密使卒諡惠穆公孺元

祐初為戶部尚書

呂公著字晦叔宰相夷簡子也識慮深遠有度量夷簡嘗曰此子公輔器也仕為奉禮郎舉進士神宗即位召為翰林學士兼侍讀頃之兼寶文閣學士知通進銀臺司時御史中丞司馬光以言張方平不可為叅政罷為學士公著封還制書言光以言舉職而賜罷則有言責者不得盡其言矣陛下雖有欲治之心而安危利害何從而知於是內出光誥付閣門又言

誥不由封駁而出則是職因臣而廢乞正臣之罪以  
正紀綱神宗手批其奏俟邇英當喻朕意後數日講  
退獨留之語曰朕欲光勸講左右非為其言事也公  
著請不已聽解封駁事拜御史中丞王安石秉政始  
置三司條例行青苗斂散法公著極論其不可曰昔  
者有為之君未有失人心而能圖治者亦未有脅之  
以威勝之以辨而得人心者今在位之賢者率以此  
舉為非而主議者一切以流俗浮論詆黜之豈有昔

者賢而今皆不肖乎會韓琦論青苗之害神宗語執  
政公著嘗面奏若韓琦因人心不忍如趙鞅舉晉陽  
之甲除君側之惡陛下何以待之安石用此為公著  
罪罷為翰林侍讀學士知潁州宋敏求草公著制云  
敷陳失實援據非宜安石不快欲明著其語陳升之  
以為不可安石乃自易之曰突誣藩鎮興除惡之名  
深駭聽聞乖事理之實公著素謹密實無此言蓋孫  
覺嘗為神宗言今藩鎮大臣如此論列而遭挫折若

當唐末五代之際必有興晉陽之甲以除君側之惡者矣神宗因誤以為公著也元豐二年官制行改正議大夫樞密副使復同知樞密院事神宗賜手札曰顧在廷之人可託中外腹心之寄均皇家休戚之重無逾卿者可亟起視事哲宗即位拜右僕射兼中書侍郎司馬光薨公著獨總揆務除吏皆一時之選自宋興大臣以三公平章軍國者四人而二人則公著父子也薨諡正獻子希哲希績希純

呂希哲字原明少好學王安石謂之曰士未官而專科舉者為貧也有官矣而復事科舉是僥倖富貴利達而已學者不由也希哲遂棄科舉一意古學父公著與安石以國事不合久在外希哲前後為管庫者幾十年元祐初公著登庸廣收天下之士而希哲以公故不得用及公著薨既免喪除兵部員外郎崇政殿說書希哲每勸導人主以修身為本修身以正心誠意為主心正意誠天下自化若身不能修雖左右之

人且不能諭況天下乎希哲為人靖重有至行晚年  
名益高 子好問

呂希績字紀常元祐為兵部員外郎除淮南轉運

呂希純字子進方父公著為相未嘗進用公著既薨朝  
廷以希純為太常丞紹聖初以寶文閣待制知亳州  
已而諫官張商英言希純附會呂大防蘇轍而中書  
舍人林希亦言希純變禮舉祀禮文薦牙盤事坐落  
職而牙盤復罷如元豐故事始公著在相位時商英



為開封府推官欲居言路嘗云老僧欲住烏寺呵佛罵祖希純以商英語白公著不悅出商英為河東提點刑獄憾之至是攻希純兄弟為甚力

呂濤字濟叔揚州人

呂夏卿字縉叔泉州人

並見事略

呂璫字季玉溫陵人也第進士官終光祿卿子惠卿升卿俱第進士惠卿官至叅知政事升卿終知江寧府歷帥廣西知揚州璫子女二十有九人

見清源志

呂大忠字進伯大防兄也舉進士哲宗即位為陝西

轉運副使移知陝州除直龍圖閣知秦州遷寶文閣待制夏人自麟府環慶路犯邊之後遂絕歲賜復欲遣使謝罪將許之大忠言夏人性桀黠強則縱困則服連年入寇邊民皆謂必有以制之今無名遣使陽為恭順實懼討伐若許之恐為夷狄所窺也大忠嘗獻言夏人兵不過三十萬戍守外戰士不過十萬三路之衆足以當之屢犯王畧而朝廷一不與較臣竊羞之遷寶文閣直學士知渭州

呂大防字微仲京兆藍田人也舉進士元祐初授尚書  
右丞俄拜中書侍郎三年拜左僕射兼門下侍郎哲  
宗朝因推廣祖宗家法以進曰祖宗家法甚多自三  
代以後惟本朝百二十年中外無事蓋由祖宗所立  
家法最善臣請舉其略古人主事母后朝見有時如  
漢武帝五日一朝長樂宮祖宗以來事母后皆朝夕  
見此事親之法也前代大長公主用臣妾之禮本朝  
必先致恭仁宗以姪事姑之禮見獻穆大長公主此

事長之法也前代宮闈多不肅宮人或與廷臣相見  
唐入閣圖有昭容位本朝宮禁嚴密內外整肅此治  
內之法也前代外戚多與政事常致敗亂本朝母后  
之族皆不與此待外戚之法也前代宮室多尚華侈  
本朝宮殿止用赤白此尚儉之法也前代人君雖在  
宮禁出輿入輦祖宗皆步自內庭出御後殿豈乏人  
之力哉亦欲涉歷廣廷稍冒寒暑耳此勤身之法也  
前代人主在禁中冠服苟簡祖宗以來燕居必以禮

竊聞陛下昨郊禮畢具禮服謝太皇太后此尚禮之法也前代多深於用刑大者誅戮小者遠竄惟本朝用法最輕臣下有罪止於罷黜此寬仁之法也至於虛已納諫不好畋獵不尚翫好不用玉器不貴異味此皆祖宗家法所以致太平者陛下不須遠法前代皆盡行家法足以為天下哲宗甚然之卒諡正愍

兄大忠弟大臨 大臨字與叔通六經尤深於禮富弼致政於家為佛氏之學大臨奏記於弼曰今大道

未明人趨異學不入於莊則入於釋疑聖人為未盡  
輕禮義為不足學人倫不明萬物憔悴此老成大人  
惻隱存心之時以道自任振起壞俗在公之力宜無  
難矣若夫移精變氣務求長年此山谷避世之士獨  
善其身者之所好豈世之所以望於公者哉弼謝之  
元祐中為祕書省正字

呂陶字元鈞眉州人

見事略

呂本中字居仁申公之曾孫舜徙右丞之子少學山谷

為詩自成一家靖康初擢尚書郎紹興初賜進士第  
除右史擢中書舍人落職奉祠平生因詩以窮耽禪  
而病清癯如不勝衣有孟浩然跨驢之相一室蕭然  
凝塵滿席裕如也每以前路資糧為念嘗有詩云病  
知前路資糧少老覺平生事業非紹興丙寅夏六月  
跣坐而逝 申公之孫好問生弼中本中本中生大  
猷大同生祖平今為桂陽太守大猷生祖仁祖  
泰弼中生大器大器生祖謙祖儉

呂行儒之下居婺州江西東萊呂行規之下居泉州呂林呂行立之下居建陽邵武社安老侍郎乃行立之後也

褚

六百三十九

姓纂子姓殷後宋共公子右為褚師因氏焉漢梁相褚大元成間有褚先生少孫並以儒學稱焉

晉褚陶字季雅錢塘人以墳典自娛嘗曰聖賢備在黃卷捨此何求年十三作鷗鳥水磴二賦見者奇之補



尚書郎

褚裒字季野康獻皇后父桓彝曰季野有皮裏春秋言其外無臧否而內有所褒貶也謝安恒云裒雖不言而四時之氣亦備矣

褚翼字謀遠以才藝楨幹稱

褚爽字弘茂恭思皇后父少有令稱為義興太守

南史褚裕之字叔度裒之曾孫後為右衛將軍武帝以為名家而能竭盡心力甚嘉之兄秀之字長倩仕

晉遷侍中 弟淡之字仲原宋時為侍中

褚球字仲寶裕之玄孫篤志好學有才思仕齊為溧陽令在縣清白資公奉而已

褚湛之字休玄秀之子謹實有意幹後拜尚書左僕射子彥回幼有清譽父卒悉推財與弟澄唯取書數千卷宋明帝時遷吏部尚書有人求官密袖中將一餅金出示之曰人無知者彥回曰卿自應得官無假此物若必見與不得不相啟此人大懼收金而去

美儀貌善容止俯仰進退咸有風則每朝會百寮遠  
國使莫不延首目送之明帝嘗歎曰褚彥回能遲行  
緩步使得宰相矣子賁字蔚先位侍中 賁弟恭字  
茂緒位義興太守子向字景政淹雅有器量位侍中  
風儀端麗眉目如畫每公庭就列為衆所瞻望 向  
子翔字世舉為義興太守省繁苛去游費郡西亭有  
枯樹忽更生枝葉以為善政所感

褚澄字彥道彥回之弟後遷侍中以勤勤見知

褚炤字彥宣彥回從父弟少有高節王儉嘗稱才堪保  
傅為成安郡召為國子博士不拜弟炫字彥緒前

後三為侍中仕齊為吏部尚書居身清正非弔問不

雜交游及在選部門庭蕭索賓客罕至子灃字士

洋仕梁為曲阿令清慎可紀子蒙位太子舍人

蒙子玠字溫理早有令譽先達多以才器許之除山

陰令在任守祿俸而已去官之日不堪自致留縣境

種蔬以自給或以玠非百里才玠曰吾委輸課最不

後列城除殘去暴奸吏勾踏若謂其不能自潤脂膏  
則如來命以為不達從政吾未服也累遷御史中丞  
褚氏自至江左人文不墜玠公平諒直文武兼資  
可謂世業無隕者矣

孝義褚修錢塘人性至孝父中都善周易為當時之冠  
隱逸褚伯玉字元璩錢塘人少有隱操往剡居瀑布山  
三十餘年隔絕人物滅景雲棲抗高木食

北史儒林褚暉字高明以三禮學稱於江南

唐褚亮字希明杭州人少警敏博見圖史一經目輒誌於心秦王授王府文學王每征伐亮在軍中嘗預祕謀有裨補之益預十八學士之選帝使為之贊

褚遂良字登善亮子貞觀中起居郎博涉文史工隸楷太宗歎曰虞世南死無與論書者魏徵白見遂良帝令侍書方博購王羲之故帖天下爭獻然莫能質真偽遂良獨論所出無舛冒者遷諫議大夫兼知起居事帝曰卿記起居人君得觀之否對曰守道不如

守官臣職載筆君舉必書 帝嘗怪舜造漆器禹雕  
其俎諫者十餘不止小物何必爾耶遂良曰漆不止  
必金為之金不止必玉為之諫者救其源帝咨美之  
時雉數集宮中帝問何祥也遂良曰秦文公時有此  
陛下前本封秦故並見以告明德帝悅曰人不可以  
無學遂良所謂多識君子哉 東坡先生曰余以謂  
秦雉陳寶也豈常雉乎今見雉即謂之寶猶得白魚  
便自比武王此謠佞之甚愚瞽其君者而太宗喜之

史不譏焉野鳥無故數入宮此正災異使魏徵在必以高宗弔耳之祥諫也遂良非不知此捨弔耳而取陳寶非忠臣也勸帝無討遼東高宗即位拜尚書右僕射帝將立武昭儀遂良曰先帝疾執陛下手語臣曰我兒與婦付卿且德音在耳何遽忘之皇后無他過不可廢翌日復言帝羞遂良因致笏殿階叩頭流血曰還陛下此笏丐歸田里

褚無量字弘度杭州人刻意墳典擢明經玄宗為太子



撰翼善記以進母喪廬墓羣鹿犯所植松柏無量號  
訴曰山林不乏忍犯吾塋樹耶自是羣鹿馴服不復  
觸 開元五年帝將幸東都無量上言所過名山川  
古帝王賢臣在祀典者並詔致祭 內府舊書目高  
宗時藏宮中甲乙叢脞無量建請以廣祕籍 七年  
太子齒胄於學詔無量升座講勸 詔無量就麗正  
殿纂續前功病困語人以麗正書未畢為恨歿後有  
於書殿得講史記至言十二篇上之帝歎息以絹五

百足賜其家

汝 六百四十

姓纂尚書有汝鳩汝方左傳有晉大夫汝寬汝濟

後漢汝郁字叔異性仁孝為魯相以德教化流人歸者

八九千戶

吐 六百四十一

北史吐萬緒字長緒鮮卑人少有武畧仕隋轉青州

總管徙翔州甚為北狄所憚

伍 六百四十二

姓纂楚大夫伍恭生舉舉生奢奢生尚員員字子胥  
奔吳其子又為王孫氏適齊

左傳襄公二十六年楚伍參與蔡太師子朝友其子伍  
舉與聲子相善 昭十九年楚子生太子建及即位  
使伍奢為之師 定四年伍員與申包胥友其亡也  
謂申包胥曰我必復楚國

新序楚不用伍子胥而破吳闔廬用之而伯

史記伍子胥楚人也名員員父曰伍奢兄曰伍尚其先  
曰伍舉以直諫事楚莊王有顯故其後世有名於楚  
員為人剛戾忍詢能成大事鞭平王尸以報父  
仇吳王賜以屬鏤之劍以鴟夷革盛尸浮之江中  
吳人憐之為立祠江上因命曰胥山隱忍就功名  
非烈大夫孰能致此伍尚奔死免父孝也

伍舉楚大夫邑於椒故曰椒舉靈王為章華臺與舉  
升焉曰臺美夫對曰臣聞國君服寵以為美安民以

為樂

前漢伍被楚人以材能稱為淮南中郎 淮南王安招

致英雋以百數被為冠首

晉隱逸伍朝字世明游心物外守靜衡門

楚 六百四十三

風俗通羊姓鬻熊封楚以國為姓左傳魯有楚尹楚丘

旅 六百四十四

風俗通云周大夫子旅之後漢高祖功臣昌平侯旅卿

莒 六百四十五

伯益之後封莒後為楚所滅以國為姓漢縵氏令莒誦

序 六百四十六

禮有序點侍孔子點揚觶

處 六百四十七

漢書藝文志趙有辨士處子著書風俗通有處興為北

海太守

巨 六百四十八

漢有荊州刺史巨武

所六百四十九

風俗通宋大夫所華之後漢武帝時諫議大夫所忠

名賢氏族言行類稿卷三十六



欽定四庫全書

名賢氏族言行類稿卷三十七

宋 章定 撰

杜 六百五十

姓纂祁姓帝堯劉累之後在周為唐杜氏成王滅唐  
遷封於杜杜伯為宣王所滅杜氏分散適魯者杜洩  
是也古有杜康

前漢杜周南陽杜衍人為中丞十餘歲少言重遲內深

次骨及為廷尉善候伺專以人主意指為獄遷為御史大夫周嘗曰三尺安出哉前主所是著為律後主所是疏為令兩子夾河為郡守治皆酷暴唯少子延年行寬厚延年字幼公明法律吏材有餘論議持平合和朝廷居九卿位十餘年後為北地太守選用良吏捕擊豪彊郡中清靜徙西河太守治甚有名徵為御史大夫居父官府不敢當舊位坐卧皆易其處子欽最知名欽字子夏目偏盲舉賢良方正

直言上日蝕地震之對又詣白虎殿對策優游不仕  
以壽終 兄子業有才能選為大常數言得失不事  
權貴

杜鄴字子夏以孝廉為郎舉方正直言之對 子林清  
靜好古亦有雅才其正文字過於鄴世言小學者由  
杜公

後漢杜茂字諸公南陽人光武拜為大將軍屯田晉陽  
以備胡寇封遂鄉侯

杜林字伯山博洽多聞時稱通儒光武徵為侍御史後  
為大司空

杜詩字君公遷南陽太守以誅暴立威省愛民役造作  
水排鑄為農器百姓便之時人方於召信臣南陽語  
曰前有召父後有杜母

杜喬字叔榮河內人

杜密字周甫少有厲俗志遷北海相官之子弟為令長  
姦惡者輒捕按之 桓帝徵拜尚書令黨事起與李

膺俱坐名行相次時人亦稱李杜焉 密去官還家  
每謁守令多所陳託同郡劉勝亦自蜀郡告歸鄉里  
閉門掃軌無所干及太守王昱謂密曰劉季林清高  
士公卿多舉之者密知昱激已對曰劉勝為大夫見  
禮上賓而知善不薦聞惡無言隱情惜已自同寒蟬  
此罪人也今志義力行之賢而密達之違道失節之  
士而密糾之使明府賞刑得中令問休揚不亦萬分  
之一乎昱慙服待之彌厚

杜篤字季雅後仕郡文學掾以目病二十餘年不闕京師

杜撫字叔和受詩後歸鄉里教授沉靜樂道舉動必以禮所作詩題文約義通學者傳之曰杜君法

魏志杜畿字伯侯為河東太守崇寬惠有辭訟相告者為陳大義自是少有辭訟魏初以畿為尚書事令曰間將授卿以納言之職顧念河東吾股肱郡故且煩卿坐鎮之在河東十六年常為天下最子恕字

務伯為黃門侍郎在朝不結交援政有得失常引綱維以正言為河東太守所在務存大體

杜襲字子緒魏初為侍中嘗獨見至於夜半入為尚書杜夔字公良善鍾律絲竹八音靡所不能紹復先代古樂為大樂令協律都尉

蜀志杜微字國輔諸葛亮選為主簿乞病求歸拜諫議大夫以從其志

杜瓊字伯瑜拜諫議大夫遷大鴻臚太常靜默少言

闔門自守不與世事

晉書杜預字元凱號曰杜武庫平吳之功兵威如破竹常激用渰涓諸水浸田萬餘頃衆庶賴之號曰杜父

南土歌曰後世無叛由杜翁孰識智名與勇功請建河橋於富平津及橋成百僚臨會武帝舉觴屬預曰非君此橋不成有左傳癖贈征南大將軍子錫字世嘏少有盛名終尚書左丞

良吏杜軫字超宗成都人察孝廉除建寧令導以德政



夷夏悅服秩滿去如初至 遷尚書郎奏議駁論多  
見施用拜掾為太守甚有聲譽 子毗字長基舉秀  
士遷尚書郎 毗弟秀字彥穎為主簿 軫弟烈明  
政事察孝廉歷平康安陽令所居有異績遷衡陽太  
守

儒林杜夷字行齊世以儒學稱博覽經籍百家之書清  
虛冲淡與俗異軌 除國子祭酒未嘗朝謁

外戚杜乂字弘理成恭皇后父有盛名於江左王羲之

目之曰膚若凝脂眼如點漆此神仙人也為丹陽丞  
藝術杜不愆少就郭璞學易卜屢有驗

南史杜僧明字弘照陳武帝引為主帥

杜稜字雄盛少落泊不為時知仕陳以平賊功除右衛  
將軍朝廷宿將獨典禁兵

循吏杜驥字度世為青冀二州刺史在任八年惠政著  
於齊土

循吏杜慧慶除交州刺史大破盧循之衆禁斷淫祀崇

修學校歲荒人飢則以私祿振給城門不夜閉道不拾遺

文學杜之常字子大家世儒學以三禮專門彊識俊才  
有名當世以為廊廟之器仕陳至鴻臚卿

隱逸杜京產字景齊少恬靜閉意榮宦專修黃老聚徒  
教授於會稽日門山

北史杜銓字士衡學涉有長者風徵為中書博士子  
振字李元舉秀才卒中書博士

杜正玄字知禮，耽志經史。隋初舉秀才試策高第。時海內唯正玄一人應秀才，後為豫章王記室。弟正臧，字為善。隋初亦舉秀才，文無點竄。時正臧弟正儀貢充進士，正倫為秀才，兄弟三人同時應命，當世嗟歎。正玄難兄難弟，信為美矣。正臧為文軌二十卷。後生寶之多資，以解褐謂之杜家新書云。

杜弼字輔玄，初為墨曹參軍，典管記長於筆札。每為時輩所推，為曲城令，為政清靜，遠近稱之。除侍御。

史子臺卿字少山仕齊位黃門侍中修國史

杜杲字子暉學涉經史有當時幹畧仕周再使於陳杲有辭辨閑於占對前後將命陳人不能屈

杜彥在隋拜雲州總管北夷畏憚胡馬不敢至塞

杜整字皇育少有風槩好讀孫吳兵法隋拜左衛將軍外戚杜超字祖仁太武思念舅氏以超為陽平公位大鴻臚卿

循吏杜纂字榮孫歷武都漢陽二郡守並以清白為名

唐杜如晦字克明京兆杜陵人也隋大業中預吏部選  
侍郎高孝基異之曰君當為棟梁用房元齡曰如晦  
王佐才也必欲經營四方捨如晦無共功者王曰非  
公言我幾失之因表留幕府從征伐常叅帷幄機祕  
方多事裁處無留進尚書右僕射仍領選引賢者下  
不肖咸得其職當時浩然歸重方為相時天下新  
定臺閣制度憲物容典率二人討裁每議事帝所元  
齡必曰非如晦莫籌之及如晦至卒用元齡策蓋如

晦長於斷而元齡善謀兩人深相知故能同心濟謀  
以佐佑帝當時言良相必曰房杜云

杜楚客少尚奇節方建成難作楚客遁舍嵩山召為給  
事中太宗曰君居山似之矣謂非宰相不起渠然耶  
杜淹字執禮材辨多聞秦王引為文學館學士常侍宴  
賦詩尤工賜銀鍾

杜審權字殷衡懿宗立進同平章事清重寡言性長厚  
居翰林最久終不漏禁近語

杜讓能字羣懿方關東兵興調發綏徠書詔叢浩讓能  
思精敏凡號令行下處事值機無所遺算帝倚重之  
杜正倫相州人隋世舉秀才天下不十人而正倫一門  
三秀才皆高第為世歆美累進中書侍郎與韋挺  
虞世南姚思廉論事稱旨太宗為設宴具召四人者  
謂曰吾聞神龍可擾以馴然領有逆鱗撓之者死人  
君亦有之卿屬遂犯吾鱗裨闕失朕其何慮危亡哉  
思卿至意故命以相樂也工屬文嘗與中書舍人董



思恭夜直論文章思恭歸謂人曰與杜丈評文今日  
覺吾文頓進

杜景佺冀州人性嚴正舉明經中第吏歌曰錄事意  
與天通由是知名入為司刑丞與徐有功來俊臣侯  
思止專治詔獄時稱遇徐杜者生來侯者死延載初  
同平章事后嘗季秋出梨花示宰相以為祥衆賀景  
佺獨曰陰陽不相奪倫瀆即為災今草木黃落而木  
復生瀆陰陽也竊恐陛下布德施令有所虧紊臣位

宰相助天治物治而不和臣之咎也頓首請罪后曰  
真宰相

杜希全京兆人積功勞至朔方節度使軍令整嚴士畏  
其威奉天之狩引兵赴難遷靈鹽豐夏節度使封餘  
姚郡王將即屯獻體要八章貶切政病帝嘉賜君臣  
歲一篇建言鹽州據要會為塞保障自平涼背盟城  
陷於虜請復城鹽州乃詔合選士三萬五千屯鹽州  
執築凡六千人閱二旬畢由是虜憚不敢輕入

杜暹濮州人五世同居事繼母孝擢明經第補婺州參  
軍秩滿歸吏以紙萬番贐之暹為受百番衆歎曰昔  
清吏受一大錢何異哉遷給事中或言暹往使安西  
虜伏其清乃拜安西副大都護守邊四年撫戎練士  
能自勤厲為夷夏所樂以公清勤約自持族子鴻  
漸字之巽第進士太子治兵平涼太子喜曰靈武我  
之關中卿乃吾蕭何也既至靈武鴻漸舉免等勸即  
皇帝位以繫中外望鴻漸明習朝章草議上之太子

即位乃為肅宗

杜佑字君卿京兆人父希望重然諾交游皆一時俊傑  
自代州都督召還對邊事拜鄴州都督破烏菴衆進  
拔新城 宦者牛仙童行邊或勸結其驩答曰以貨  
藩身吾不忍 佑以蔭補以戶部侍郎判度支建中  
初河朔兵罕戰民困賦無所出佑以為救弊莫若省  
用省用則省官 張建封卒軍亂乃詔佑移治初佑  
決雷陂以廣灌溉斥海瀕棄地為田積米至五十萬

斛列營三十區士馬整飭四隣畏之

杜棕字永裕佑子以門蔭太和末為鳳翔節度使有詔  
沙汰僧尼時有五色雲見監軍欲奏之棕曰雲物變  
色何常之有未幾獲白兔監軍又欲奏之棕曰野獸  
未馴且宜畜之旬日而斃監軍不悅以為掩蔽聖德  
獨畫圖獻之後文宗謂棕曰李訓鄭注皆因瑞以售  
其亂乃知瑞物非國之慶卿前在鳳翔不奏白兔真  
先覺也對曰昔河出圖伏羲以畫八卦洛出書大禹

以叙九疇皆有益於人故足尚也至於禽獸草木之  
瑞何時無之劉聰桀逆黃龍三見石季龍暴虐得蒼  
麟十六白鹿七以駕芝蓋以是觀之瑞豈在德玄宗  
嘗為潞州別駕及即位潞州奏十九瑞玄宗曰朕在  
潞州惟知勤於職業此等瑞物皆不知也願陛下專  
以百姓富安為國慶其餘不足取也上善之咸通二  
年二月同平章事一日兩樞密使詣中書宣徽使楊  
公慶繼至獨揖悰受宣公慶出斜封文書以授悰發

之乃宣宗大漸時宦官請鄆王監國奏也且曰當時宰相無名者當以反法處之惛反復讀良久曰聖主君等秉權以愛憎殺大臣公屬禍無日矣慶色沮去帝怒亦釋大臣遂安封邠國公贈太師

杜黃裳字遵素京兆人擢進士第中宏辭郭子儀辟佐朔方府貞元末遷太常卿王叔文用事黃裳未嘗過其門壻常執誼輔政黃裳勸請太子監國執誼曰公始得一官遽開口議禁中事黃裳怒曰吾受恩三

朝豈以一官見賣即拂衣去 劉闢叛唯黃裳固勸  
不赦因奏罷中人監軍而專委高崇文凡兵進退黃  
裳自中指授無不切於機蜀平羣臣賀憲宗目黃裳  
曰卿之功 上與黃裳論及藩鎮黃裳曰德宗自經  
憂患務為姑息不生除節帥有物故者先遣中使察  
軍情所與則授之中使或私受大將賂歸而譽之即  
降旄鉞未嘗有出朝廷之意者陛下必欲振舉綱紀  
宜稍以法度裁制藩鎮然後天下可得而理也上深



以為然於是始用兵討蜀以至威行兩河皆黃裳啓之也上與宰相論自古帝王或勤勞庶政或端拱無為互有得失何為而可黃裳對曰苟慎選天下賢才而委任之有功則賞有罪則刑選用以公賞刑以信則誰不盡力何求不獲哉明主勞於求人而逸於任人此虞舜所以能無為而治者也至於簿書獄市煩細之事各有司存非人主所宜親也昔秦始皇以衡石程書魏明帝自按行尚書事隋文帝衛士傳殮皆

無補於當時取譏於後來其耳目形神非不勤且勞也所務非其道也夫人主患不推誠人臣患不竭忠苟上疑其下下欺其上將以求理不亦難乎上深然其言

杜兼正倫五世孫為濠州刺史

杜亞字次公京兆人肅宗在靈武上書論時事遷諫議大夫興元初拜淮南節度使至則治漕渠人皆悅賴杜審言字必簡襄州人擢進士才高嘗語曰吾文章得

屈宋作衙官吾筆當得王羲之北面武后召將用之令賦歡喜詩嘆重其文為修文館直學士

初審言病宋之間武平一省候答曰甚為造化小兒相苦少與李嶠崔融蘇味道為友世號崔李蘇杜

杜甫字子美審言孫少貧李邕奇其才先往見之舉進士不中第困長安玄宗朝獻三大禮賦帝奇之使待制集賢院肅宗拜右拾遺與房琯為

布衣交 闕輔飢輒棄官去客秦川流落劍南  
嚴武表為參謀檢校工部員外郎性曠放好論  
天下事與李白齊名時號李杜為歌詩傷時  
憫俗情不忘君人憐其忠

杜牧字牧之佑之孫善屬文第進士復舉賢良方正  
拜殿中侍御史時劉從諫守澤潞何進滔據魏博  
驕蹇不循法度牧追咎長慶以來朝廷措置亡術  
復失山東鉅封劇鎮所以繫天下輕重不得承襲

輕授皆國家大事嫌不當位而言實有罪故作  
罪言云云上策莫如自治中策莫如取魏下策  
為浪戰 遷中書舍人剛直有奇節不為齷齪  
小謹敢論列大事指陳利病尤切至 初牧夢人  
告曰爾應名畢復夢書皎皎白駒字俄而炊甑裂  
牧曰不祥也乃自作墓誌悉取所為文章焚之牧  
於詩情致豪邁人號為小杜以別杜甫云

杜顓字勝之牧弟舉進士禮部侍郎賈餗語人曰得

杜顗足敵數百人授祕書正字善屬文與牧相  
上下

宋朝杜鎬字文周常州無錫人也少好學初應舉將  
試有鼠銜孝經疏置榻前鎬怪之取以熟誦果試  
題出其中遂與選鎬博學又有記問兄為法官有  
毀其父之畫象為近親所訟疑不能決鎬曰僧道毀  
佛老像此可比也兄從之衆服其審 將南郊慧星  
見宰相趙普問鎬鎬曰當祭而日食猶廢祭況慧星

見如此乎普言於太祖而罷其禮翌日遷著作佐郎  
累遷工部員外郎太宗問西漢賜予多用黃金而  
近代不能何也鎬曰當漢時佛事未興故金甚賤太  
宗以為然景德初直龍圖閣待制因以命鎬加都官  
郎中從幸澶淵遇懿德皇后忌日疑軍中鼓吹之禮  
時鎬先還備儀仗命馳騎問鎬鎬以武王載木主前  
歌後舞為對王欽若勸真宗為祥瑞以鎮服四裔  
真宗疑焉因問鎬河出圖洛出書果何事鎬遽對曰

此聖人以神道設教耳真宗意遂決議者謂祥瑞  
事啓自欽若而成於鎬云 預修冊府元龜詳定東  
封儀注進秩禮部侍郎 鎬博聞強記凡所檢閱  
必戒書吏云某事某書在某卷幾行覆之一無差  
每得異書多召問之必手疏本末以聞士大夫有  
所撰著多訪以古事雖晚輩卑品請益應答無  
倦年踰五十猶日治經史數十卷或寓直館中  
四鼓則起誦春秋所居僻陋僅庇風雨處之二



十載不遷徙燕居暇日多挈醪饌以待賓友性和易清  
素有懿行士類推重之 子渥大理寺丞 孫杞字  
偉長以鎬廕補將作監主簿知建陽縣強敏有才  
閩俗老而生子輒不舉杞使伍保相察犯者得重罪  
累拜天章閣待制環慶路經略安撫使知慶州 杞  
兄植以文雅知名終少府監弟樞亦強敏為比部員  
外郎

杜衍字世昌越州山陰人擢進士甲科知乾州權

知鳳翔府及罷歸二州民邀留境上曰何奪我賢  
太守也提點河東路刑獄遷尚書祠部員外郎按  
行潞州折寃獄知州王曙為作辯獄記高繼昇知  
石州人告其連蕃族謀變衍辯其誣為河北  
都轉運使遷工部郎中不增賦於民而用足

以諫議大夫知天雄軍特召為御史中丞兼判  
吏部流內銓吏多受賕出縮為姦衍視事即敕  
吏函銓法問曰盡乎曰盡矣力閱視具得本末

曲折明日令諸吏勿升堂各坐曹司聽行文書銓  
事悉自予奪吏不能為姦利改知審官院裁制  
如判銓時權知開封府遠近聞衍名莫敢干以私  
拜同知樞密院事改樞密副使夏竦上攻守策  
宰相欲用出師衍曰僥幸成功非萬全之計爭  
議久之求罷不許特賜手詔敦勉為河東宣  
撫司有善政拜吏部侍郎樞密使契丹與元  
昊戰黃河外參知政事范仲淹宣撫河東欲以

兵自從衍曰二國方交關勢必不來我兵不可  
妄出仲淹爭議帝前詆之甚切仲淹嘗出衍門  
下時為參知政事數爭事帝前衍初無愠色而  
仲淹益敬服之會契丹駙馬劉三淑避罪來歸  
邊臣欲以官縻之衍以為本朝與契丹結好久  
不可以生事還之四年拜同平章事 衍為相  
與富弼韓琦范仲淹同革弊事以修綱紀而衍尤  
抑絕僥倖凡內降恩澤者一切不與每積至十數

必面納之仁宗嘗謂諫官歐陽修曰外人知衍封  
還內降耶吾居禁中有求恩澤者每以衍不可  
告之而止者尚多於衍所封還也由是權倖寢  
不說 衍為相凡百日而罷上印綬乃以太子少  
師致仕謝事十餘年累遷太子太師封祁國公  
衍清介有守舊無居第既退方葺舍南都出  
入如平日無軒冕者好吟詩晚喜草書臨終戒  
後事皆有法作遺疏千餘言其畧曰勿以久安而

忽邊防之戒勿以既富而輕財用之靡又請早建儲  
副以安天下心卒謚正獻 衍嘗言父母之諱在我  
而已他人何預帥弁門吏請家諱衍曰下官無所  
諱惟諱取枉法贓

古 六百五十一

闕

魯

六百五十二

姓纂周公子伯禽封魯至頃公三十四代九百餘年  
為楚所滅子孫以國為氏

史記魯仲連者齊人也好奇偉倣儻之畫策而不肯仕  
宦任職好持高節 新垣衍曰吾聞魯仲連先生齊

國之高士也又曰吾乃今日知先生為天下之士也  
燕將保守聊城田單攻之不下魯仲連乃為書約之  
矢以射城中遺燕將書云云燕將乃自殺 齊欲爵  
魯連魯連逃隱於海上曰吾與富貴而詘於人寧貧  
賤而輕世肆志焉

後漢魯恭字仲康扶風人與弟丕俱居太學習魯詩拜  
中牟令專以德化為理 政有三異 後為司徒

魯丕字叔陵兼通五經為世名儒舉賢良方正高第遷



野令州課第一關東號曰五經復興魯叔陵

吳志魯肅字子敬周瑜嘗就肅求資糧肅家有两困米  
各三千斛乃指一困與之少有壯節好為奇計一見  
孫權便說拒曹公而論帝王之畧 雖在軍陣手不  
釋卷子淑為昭武將軍嚴整有方幹

晉書良吏魯芝字世英有名德為西州豪族舉孝廉除  
郎中為并州刺史遷大鴻臚 潔身寡欲和而不同  
服事華髮以禮終始

隱逸魯勝字叔時為建康令稱疾去官再徵博士舉中書郎皆不就

隱逸魯褒字元道好學多聞以貧素自立傷時貪鄙著錢神論以刺之

南史魯悉達字志道歸陳授江州刺史不以富貴驕人雅好詞賦招禮賢才弟廣達字徧覽少慷慨立志功名虛心愛士江總題其棺為詩曰黃泉雖抱恨白日自留名悲君感義死不作負恩生

北史儒林魯世達隋時為國子助教授毛詩章句義疏  
唐魯炅幽州薊人長七尺為隴右節度使哥舒翰引為  
別奏顏真卿謂翰曰君興郎將亦嘗得人乎炅時立  
階下翰指炅以對 破安祿山畫攻守勢於帝前封  
金鄉公俄拜御史大夫襄鄧十州節度使

宋朝魯宗道字貫之亳州人也少孤苦學以文謁戚綸  
綸哭異之舉進士為定遠尉又為海鹽令疏治東南  
舊港口導海水至邑下人以為利號公浦天禧元年

詔兩省置諫官六員下兼他職考所言以為殿最宗  
道與劉煜同選自通判河陽擢為右正言諫章由閤  
門始得進而罕賜對宗道請得面論事而上奏通進  
司自是為故事遷左諭德 真宗一日遣中使召之  
至其家俟之久方從酒家還使者曰即上訝來遲其  
將何詞以對宗道曰第實言之中使曰然則當得罪  
宗道曰飲酒人之常情欺君臣子之大罪也中使嗟  
歎而去真宗果問使者具如宗道之言真宗問宗道

何故私至酒家宗道謝曰有故人自鄉里來臣家貧乏杯盤故就酒家觴之也真宗善其無隱自是有大用之意拜右諫議大夫參知政事遷禮部侍郎章獻問宗道唐武后何如主對曰武后幾危社稷唐之罪人也章獻默然時有上書請立章獻七廟者章獻以問輔臣宗道力以為不可曰若立劉氏七廟如嗣君何章獻與仁宗將同幸慈孝寺欲以大安輦前行宗道曰婦人有三從之義在家從父既嫁從夫夫沒從

子章獻乃從後行宗道在政府裁仰僥倖不肯以名器私人時樞密使曹利用有所憑恃肆為驕橫宗道屢折之凡貴戚近習莫不斂迹薨謚肅簡

魯有開字元翰本青州壽光人也從父宗道仁宗朝參知政事始居亳後徙京師有開事親以孝聞知確山縣獨治一大姓能撼邑事者縣遂無事興廢陂澆民田數十頃飛蝗不入境富弼謂有開有古循吏風薦之後知冀州河決小吳水不至城下數里有開議

增築護城隄人皆謂初無水患何以勞役為有開曰  
當備未然後水至而民不病計之上也卒成之明年  
河決水至以有備州以無患朝廷遣使安撫河北冀  
州民遮使者言有開治效擢拜膳部郎中

庾 六百五十三

姓纂堯時掌庾大夫以官命氏至春秋時周有大夫  
庾皮皮子過邑於緱氏衛有庾公差

後漢庾乘字世遊遊學宮為諸生傭後能講論自以卑

第每處下坐諸生博士皆就讎問由是學中以下坐為貴後徵不起號徵君

晉書庾亮字元規美姿容談論元帝辟為西曹掾拜中書郎領著作侍講東宮遷給事中黃門侍郎後為都督出鎮武昌佐吏殷浩之徒秋夜登南樓亮至諸人將避亮曰老子於此處興復不淺便據胡牀與浩等談詠竟夕亮將葬何曾之嘆曰埋玉樹於土中使人情何能已子三彬義齋彬年數歲雅量過人義



少有時譽 龠字道季好學有文章為丹陽尹表除

衆役六十餘事亮四弟懌字叔預 冰字季堅 條

字幼序 翼字稚恭少有經綸大畧為都督鎮武昌

戎政嚴明經畧深遠雅有大志欲以滅蜀為已任徙

鎮襄陽綏來荒遠務盡招納之宜稚恭慷慨亦擅雄

聲

庾峻字山甫祖乘高才退讓惟修德行伯父疑蘇林曰

尊伯為當世令器君兄弟復俊茂此尊祖積德之所由

也子敦字子嵩雅有遠韻有重名為搢紳所推

庾純字謀甫博學有才藝為世儒宗歷河南尹子粦

字允臧少有清節

庾袞字叔褒事親以孝稱察孝廉舉秀才清白異行皆  
不降志世號之為異行

文苑庾闡字仲初鄆陵人拜給事中領大著作

南史庾悅字仲豫亮之曾孫仕晉為司徒右長史入宋

遷建威將軍江州刺史族弟登之字元龍少以強

濟自立後為司徒長史東海太守

庾仲容字子仲博學少有盛名

庾杲之字景行劉劭見而奇之曰見卿足使江漢崇望  
杞梓發聲王儉用為長史蕭緬曰庾景行泛淥水依  
芙蓉何其麗也時人以王儉府為蓮花池 嘗兼侍  
中柳世隆曰庾杲之為蟬冕所映彌有華采

庾華字休野杲之叔父為荊州別駕清身率下杜絕請  
託布被蔬食妻子不免飢寒齊明帝手敕褒美州里

榮之遷會稽郡丞唯守公祿清節愈厲

庾易字幼簡性恬靜不交外物以文義自樂詔徵不就  
子黔婁字子員仕齊為編令政有異績縣多猛獸黔  
婁至猛獸皆度往臨沮界時以為仁化所感父亡  
居喪過禮廬於冢側除蜀郡太守在職清素百姓  
便之弟於陵字介拜太子洗馬梁武帝曰官以人  
清豈限甲族弟肩吾字慎之簡文開文德省置學  
士肩吾充其選

庾域字司太梁武帝辟為郢州主簿嘆美其才曰荆南  
杞梓其在斯乎仕梁至輔國將軍子興字孝卿  
梁初為尚書郎

孝義庾震字產文父母無以葬賃書以營事至手掌穿

劉虬為撰孝子傳

見解叔  
謙傳

孝義庾道愍有孝行能屬文仕齊位射聲校尉族孫沙  
彌亦以孝行著沙彌子待字元德性至孝父憂居  
喪過禮官至少府卿

隱逸庾詵字彥實經史百家無不該綜性託夷簡特

愛林泉諡貞節處士

隱逸庾承先字子通是非不涉於言喜愠不形於色玄

經釋典靡不該悉九流七畧咸所精練隱居士臺山

北史庾業延魏道武時為外朝大人參預軍國從平中原

拜安遠將軍為將有謀畧士衆服其智勇名冠諸

將

文苑庾信字子山博覽羣書為文綺麗世號為徐庾

徐謂

徐陵後進競相模範仕周累遷散騎常侍聘於東魏文

章辭令盛為鄴下所稱

庾自直隋授著作佐郎解屬文尤善五言詩

藝術庾季才 庾質

唐庾敬休字順之鄧州人擢進士第中宏辭拜起居舍  
人再為戶部侍郎言蜀道米價騰踊百姓流亡請以  
本道闕官職田賑貧民詔可為左丞

祖六百五十四

姓纂子姓殷後殷王祖甲祖乙丁亥庶因氏焉殷有祖已祖伊漢有祖沂始家涿郡

尚書高宗彤日高宗祭成湯有飛雉升鼎耳而雊祖已訓諸王西伯戡黎祖伊恐奔告于王曰天既訖我殷命格人元龜罔敢知吉祖伊祖已殷賢臣

晉祖逖字士雅輕財好俠慷慨有節尚散穀帛以賙貧乏有贊世才具中夜聞雞起舞為奮威將軍北伐及渡江中流擊楫誓清中原兄納字士言最有



操行性至孝為軍諮祭酒

祖台之字元辰官至侍中撰志怪書行於世

南史文學祖冲之字文遠稽古有機思解褐徐州參軍  
明厯法解鍾律又特善筭嘗造指南車又造歌器又  
造千里船等器 子順之字景爍少傳家業究極精  
微亦有巧思入神之妙

北史祖瑩字元珍父季貞多識前言往行位中書侍郎  
鉅鹿太守瑩八歲誦詩書親屬呼為聖小兒高允曰

此子偉器非諸生所及終當遠至以才名拜大學博士與袁翻齊名時為語曰京師楚楚袁與祖洛中翩翩祖與袁累遷國子祭酒祕書監以文學見重常云文章須自出機杼成一家風骨何能共人同生活性爽俠有節氣士有窮厄必見存拯子珙字孝徵少馳令譽為世所推

文苑祖鴻勳父慎仕魏歷鴈門咸陽太守政有能名鴻勳位至高陽太守

武 六百五十五

姓纂周平王少子生而有文在手曰武遂以為氏漢武臣為趙王又有武陟功臣表梁鄒侯武彪傳六代後居沛國

晉武陟字元夏父周為魏衛尉陟沉敏有器量早獲時譽與二弟韶叔夏茂季夏並總角知名劉公榮見周三子曰皆國士也元夏最優有輔佐之才位至開府儀同三司韶位至散騎常侍茂位至尚書

唐武平一名甄博學通春秋工文辭武后時畏禍不敢  
與事隱嵩山屢詔不應 初崔日用自言明左氏春  
秋諸侯官族他日學士大集日用折平一曰君文章  
固耐久若言經則敗績時崔湜張說素知平一該習  
勸令酬語平一乃請所疑條舉始末無留語日用曰  
吾請北面合坐大笑孫元衡儒衡

武元衡字伯蒼舉進士德宗欽其才擢御史中丞嘗對  
延英帝目送之曰是真宰相器元和二年拜門下侍

郎同平章事帝素知堅正有守眷禮異他宰相時蜀  
新定使元衡至綏靖約已寬民比三年上下完實蠻  
夷懷歸雅性莊重雖淡於接物而開府極一時選八  
年還秉政李吉甫李絳數爭事帝前元衡獨持正無  
所違附帝稱其長者 淮蔡用兵帝悉以機政委之  
武衡字廷碩元衡從父弟姿狀秀偉不妄言與人交  
終始一節知諫議大夫事皇甫鎛以宰相領度支剥  
下以媚天子儒衡疏其狀議論勁正有風節且將大

用時元稹倚宦官知制誥儒衡鄙厭之會食瓜蠅集其上儒衡挿以扇曰適從何處來遽集此一坐皆失色

宋朝武行德太原榆次人也身長九尺餘氣貌洪偉少負薪道遇晉高祖見其魁梧甚奇之因留之帳下仕晉為寧國軍都虞侯周世宗授保大軍節度使封宋國公國初改封韓再鎮忠武移安遠召為太子太傅卒

萬 六百五十六

急就章萬改卿

前漢游俠萬章字子夏在長城西號曰城西萬子夏為

京兆尹門下督從至殿中侍中諸侯貴人爭欲揖章

莫與京兆言者 門車常接轂

禹 六百五十七

夏禹之後

羽 六百五十八

左傳鄭大夫羽頡又虜姓後魏羽弗氏改為羽氏

宇六百五十九

見何氏姓苑

鄆六百六十

鄆子國在琅琊其後以國為氏

甫六百六十一

風俗通甫侯之後

府六百六十二



風俗通漢有司徒掾府悝

舞

六百六十三

見姓苑

輔

六百六十四

左傳晉大夫輔踪

主

六百六十五

見姓苑

姥

六百六十六

見何承天姓纂

堵 六百六十七

左傳鄭有堵叔

扈 六百六十八

風俗通趙有扈輒

虎 六百六十九


風俗通漢有太守虎旗其先八元伯虎之後

鵠 六百七十

郿郡太守司馬牟之後因以為氏

普 六百七十一

後魏十姓獻帝次兄為普氏



名賢氏族言行類稿卷三十七